



13. august 2021

UKA2021/42

Inatsisartut suleriaasianni § 33 naapertorlugu matumuuna inatsisartunut aalajangiiffigisassatut siunnersuut imaattoq saqqummiuppara:

Aarrit nannullu takornariartsinermi tammajuitsussarsiorluni piniartartunut pisassiissutigineqarsinnaanngorsinnaanerit siunertaralugu Naalakkersuisut, 2022 naatinnagu saqqummiunneqartussamik, nalunaarusioqqullugit peqquneqarnissaannik inatsisartut aalajangiiffigisassaattut siunnersuut. Nalunaarusiamittaaq aningaasarsiutaasinnaanerisa aammalu nunarsuarmioqatigiit aalajangersagaasa killilersugaat qulaajarneqassapput.

(Inatsisartunut ilaasortaq Aslak W. Jensen, Siumut)

Tungavilersuut:

Nunatta pisuussutai suugaluartulluunniit inuiaqatigiit pigaavut. Pisuussutitta iluaqutigineqarnerat tungaviussaaq aningaasarsiornikkut ineriartornitsinnut. Nunatsinni pisuussutitta uumassusillit uumassuseqanngitsullu niuerutigineqarnerini nunatsinnut innuttaasunullu aningaasarsiornikkut iluaqutaanerpaaffigisinnaasaat aallaavigineqartassaaq.

Aningaasaqarneq Aningaasarsiornerlu pillugit innuttaasunik qaammarsaanerup ingerlaavartup aallartinneqarnissaa sulissutigineqartariaqarmat matumani isuma imaattoq saqqummiupparput.

Aningaasarsiutaasinnaasut isaatitsissutigilluarneqarsinnaasut ilagaat piniakkanik killilersukkanik ass. nannunik imalt. aarrinik, tammajuitsussarsiorlutik piniartartunut pisaqartitsinerit. Nunatsinni nannunniartartut amerlanersaat arlaleriarlutik nannuttareersimasarput. Taamaattumillu nannumik pisarneq nutaajuneq ajorluni. Nannuttut nuannaarutigisaqaat, taamaattorli nannuttareersimasunut nannup neqaata amiatalu iluaqutiginerisa saniatigut annerusumik aningaasarsiutigineqarneq ajorpoq.

Nunat sanilerisagut qiviarutsigit Nunavummi nannumut ataatsimut tammajuitsussarsiorluni piniartitsineq \$40.000-ip \$60.000 akornanni akeqartarpoq¹. Tassa 250.000 kr. missaanniit 400.000 kr. tungaannut nanoq ataaseq aningaasarsiutaasarpoq. Canadamilu piumasaqaataavoq naggueqatigiit inuit kisimik nannunniartitsisinnaasassasut.

Nunatta kangiani avanersuarmilu nannunniartitsisinnaanernut aaffanniartitsisinnaanernullu tammajuitsussarsiorluni piniartartunut piniartitsisinnaanerup qanoq inunnut iluaqutaasinnaanerata nalunaarusiarineqarnissaa pisariaqarpoq. Takorluulaartigu, qanoq piniartuulluni nannunniartitsisinnaanermut periarfissaqalerluni, annertuumik, piniakkatigut isertitat saniatigut aningaasarsiorsinnaalluni. Ila immaqa piniartutut inuuneq inuusuttatsinnit soqutigineqaleriartoqqilis-sagalarpoq. Kisitsisimmi takutippaat, piniartutut inuuniuteqartut ukiuni kingullerni ikiliartupiloortut².

¹ [Hunters' polar bear trophies are put on ice - Anchorage Daily News \(adn.com\)](#)

² [Piniarnermut allagartallit kingorna suussuseq, piffissaq aamma kommune. PxWeb \(stat.gl\)](#)



Neriutigaara oqallineq pitsaasumik ingerlassinnaassagipput, angusaqarfiusumillu
nalunaarusiortoqarnissaanut Inatsisartuni ataatsimoorluta.

Siunnersuutip aningaasatigut allaffissornikkullu pisortanut kingunerisassai

Pilersaarusionermermi A/C-fuldmægtigimik ataatsimik sulisitsinissaq annertunerpaamik
missingersorneqarpoq, 500.000 kr.-inik naleqartumik.

Siunnersuutip aningaasatigut allaffissornikkullu namminersortunut kingunerisassai

Soqanngilaq.

Siunnersuutip aningaasatigut allaffissornikkullu innuttaasunut kingunerisassai

Soqanngilaq.